



# FACTVM DV PROCES

D'entre M<sup>e</sup> François Bellengard pourueu du Doyenné de S. Yrieys, demandeur en requeste ciuile, & defendeur.

*Et M<sup>cs</sup> Jean Sangeaux, & Iaques Gentils son resignataire, defendeurs. Et encores M<sup>e</sup> Jean des Argillieres pretendu deuolutaire aussi demandeur en requeste ciuile.*

**L**E demandeur fonde sa requeste ciuile premierement sur ce que l'arrest duquel il se plaint a esté donné sur pieces faulses: Sçauoir est, sur les registres de Desprez & de Veyres banquiers, qui enoncent que la procuration de M<sup>e</sup> François Fabry dernier titulaire du Doyenné de S. Yrieys a esté enuoyée de Tulles à Lyon, & de Lyon à Rome dés le mois de Nouembre 603. combien qu'elle n'ait bougé du coffre de Fabry, auquel elle a esté trouuee lors de son décez, aduenu au mois de Feurier 1604.

Le principal moyen par lequel le demandeur impugnoit la prouisiō du defendeur au proces, estoit, qu'elle auoit esté prinse sur vne petite datte. Le Cōseil a iugé que ce moyen n'estoit point receuable cōtre lesdits registres, qui sont escritures publiques, sans inscription en faux. Voilā pourquoy il ne s'y est point voulu arrester, à cause de l'obmission de ceste formalité, mais à present qu'elle est couuerte par l'inscription, en laquelle le demandeur est entré, ce moyen est suffisant pour faire retracter l'arrest duquel il se plaint, comme ayant esté donné sur pieces decisives qui sont faulses.

Le defendeur respond que le demandeur n'est point receuable à faire ceste inscription, parce qu'il a produit lesdits registres, mais le demandeur replique qu'il ne les a point produits pour demeurer d'accord de ce qu'ils cōtiennent, ains pour les contredire, & monstrier qu'ils māquent en ce qui est requis par l'ordonnance, pour prouuer l'enuoy d'une procuration, de sorte qu'on ne peut prendre la production que le demandeur a fait desdits registres pour vn argument de l'approbation d'iceux, puis qu'il l'a fait à vne fin contraire.

La seconde ouuerture de requeste ciuile depend d'une surprise, commise par le defendeur, en ce que combien qu'il n'ait point articulé l'enuoy de la procuratiō de Fabry, comme on peut apprendre par la lecture de ses faits, toutesfois il l'a verifié, ainsi qu'il dit luy mesmes par ses escritures faites au proces, d'où s'ensuit que l'enqueste du demandeur est nulle, pour auoir esté faite sur chose non contestee, ce qui doit d'autant plus auoir lieu au Conseil, que les enquestes ne s'y communiquent point & par consequent l'arrest donné en consequence d'icelle est subiect à retractation pour auoir esté rendu sur vn fait esgaré.

Pour vn troisieme moyen de requeste ciuile le demādeur remonstre qu'il y a eu soustraction de pieces, en ce que le registre auquel la petite datte de la prouision du defendeur estoit contenuë, a esté bruslee pour empescher que le demādeur n'en eust preuue, ce qui se peut verifier par des personnes qualifiees qui estoient à Rome lors de ce bruslement affecté, & qui ont veu le registre auparauant qu'il fust consummé

A





par le feu, ne faisant rien de dire, par le defendeur qu'il n'a point assez de credit à Rome pour auoir fait esuanoüyr vn registre public cōme estoit celuy-là, car il y a d'autres gens qui s'en sont meslez pour luy, quant ce ne seroit que les Officiers de la daterie, qui auoient interest que ce liure ne fut point exhibé, parce qu'il eust descouuert leur caballe, qu'ils craignent de faire cognoistre aux François, sachans qu'ils ne l'approuuent point.

Reste vne quatriesme & derniere ouuerture de requeste ciuile, qui est, qu'il y a eu dol personnel du defendeur en l'obtention de l'arrest, qui n'a paru que par l'euement, car le demandeur a tousiours soustenu au proces que le defendeur estoit fideicommissaire du Thresorier Iarrige, il a esté receu à le verifier, & l'a prouué de fait, pour ce qui estoit du project de confidence qui auoit esté pris entr'eux, mais quant à l'exécution il n'en pouuoit rien monstrier auparauant l'arrest, parce qu'on attendoit à la faire esclorre apres que le defendeur auroit esté maintenu: Comme de fait, aussitost que cela a esté le defendeur a resigné le benefice en faueur de Gentils, moyenant de l'argent & des rentes que Gentils a baillé au Thresorier Iarrige, ainsi que le demandeur pretend auoir verifié par vn examen à futur, duquel il y a appel, mais non considerable, d'autant qu'il a esté fait en vertu d'une commission qui est representee sur vn fait qui est suruenü depuis l'arrest, & auparauant contestation en cause sur la requeste ciuile de l'entherinement de laquelle il s'agit.

Le defendeur s'efforce de faire rejeter cest examen à futur, disant que le demandeur n'est point receuable à verifier la cōfidence qu'il allegue, parce qu'il n'est point pourueu par deuolut, mais on luy respond que cela est iugé par l'arrest du Conseil du 5. May 607. par lequel le defendeur ayant demandé le reject des faits que le demandeur auoit articulé pour la verifier, il en a esté debouté, & condamné aux despens. Il est vray que le fait receu par cest arrest est differend de celuy que le demandeur pretend auoir prouué par son examen à futur, mais ceste difference ne consiste qu'au temps: car en effect ce n'est que la suite de la premiere confidence qui est esclorse par ce dernier acte, au lieu qu'elle estoit couuerte par le premier, auquel le dernier se refere comme à son origine, *Nam quæ prioris negotij explicandæ causæ geruntur, nihil refert quo tempore consummentur* par la loy *nam & seruius ff. de neg. gest.*

Contre tous ces moyēs de requeste ciuile le defendeur n'oppose qu'une seule defense, qui est, que le demandeur n'apporte rien de nouveau pour faire retracter l'arrest, duquel il se plaint, mais le Conseil peut voir que l'inscription en faux contre les registres des banquiers, est nouuellement faite, & que l'obmissiō d'icelle peut auoir donné lieu à l'arrest, parce qu'encores que le demandeur ait prouué que lesdits registres sont faux, toutesfois le Conseil n'y pouuoit toucher, *quia de fide tabularum nihil dicebatur*: comme aussi le Conseil peut iuger que la remarque du fait concernant l'enuoy de la procuration de Fabry, celle du brullement du registre des petites dattes de Rome, ensemble le fait de la Symonie commise par le defendeur avec le Thresorier Iarrige, sont des moyens nouveaux, dont aucuns sont nés, & les autres descouverts depuis l'arrest, duquel l'autorité ne lairra point de demeurer entiere, encorès qu'on la retracte à cause du dol personnel du defendeur, & de ce qui est suruenü depuis: *Nam & si nihil facile ex solemnibus mutandum sit, tamen ubi aequitas euident poscit subueniendum est. l. diuus. ff. de integ. restit.*

Pour ce qui est du fond le demandeur pretend que la prouision du defendeur est nulle. Ses moyens sont, qu'elle est obtenüe sur vne procuration pour resigner passée pardeuant vn Notaire & deux tesmoins tous domestiques du resignant, ou du resignataire contre l'Ordonnance de l'an 550. article III. qui doit par identité de raison



estre esté duë aux actes receus par des Notaires Royaux parce qu'ils ne sont pas plus fidels que les autres.

D'auantage, ceste procuration à esté gardée par Fabry iusques au iour de son decez, qui monstre qu'en apparence il a donné le benefice & iceluy retenu en effect, en se reseruant la procuration : en vertu de laquelle on l'en pouuoit depousseder, ce qui rend sa procuration nulle, comme maître Charles du Moulin ; au conseil 60. dit, qu'une donation dont la minute est demeurée par deuers le donateur, est inuuable, parce qu'il est en sa puissance de ne la point entretenir, & d'en abolir la memoire en la mettant au feu.

Ceste retention est prouuée par plusieurs tesmoins sans reproche, qui ont veu ladite procuration de Fabry sur l'heure de son decez, il est vray qu'aucuns de ses tesmoins sont Chanoines de saint Yrieys, dont le chapitre est interuenu au proces, mais cela ne les rend point suspects, parce qu'ils s'esloient declarez auparauant leur interuention, joint qu'ils n'ont plaidé qu'en corps, & pour soustenir que la collation du benefice leur appartenoit, & non en particulier, n'y pour impugner la resignation que Fabry en a fait en faueur du deffendeur.

De la retention de ceste procuration, le demandeur induit le fait de la petite datte, car puis qu'elle n'a bougé de la maison de Fabry de son viuant, il faut conclurre qu'elle n'a esté enuoyée à Rome qu'apres sa mort, & que la prouision du benefice qui se trouue dattée auparauant a esté entée sur vne petite datte, joint que le demandeur prouue par les missiues de Desprez trouuées en la possession de Fabry, lequel en les gardant a fait assez cognoistre qu'il approuuoit ce qui y est contenu, qu'il estoit coustumier d'user de petites dattes, & qu'il s'en estoit seruy pour le mesme benefice l'espace de six ans entiers immediatement, precedent son decez : à quoy faut adjouster pour la cōfirmation de ce point, que les registres des banquiers ne portent pas qu'ils ayent receu n'y deliuré la procuration de Fabry, selon qu'ils y sont obligez par l'ordonnance de l'an cinq cens cinquante, articles cinq & douziesme, encores qu'ils ayent remarqué d'autres particularitez inutiles, à l'esgard de celle-là : bien est vray que de Veyres l'un d'eux rapporte par son registre qu'il a eu responce de Bothereau son correspondant à Rome, par laquelle il luy mande qu'il a receu *memorialia & procuratoria supra scripta*. Mais ce n'est point assez, parce qu'il deuoit faire notte comment il auoit receu & deliuré la procuration, en quel iour, & à qui : joint que ceste enonciation generale se peut adapter à d'autres procurations cottées sous les numero 4475. 76. & 77. du mesme enuoy, de sorte que l'on peut dire que de Veyres est en dol, *quia fallendi causa obscure locutus est*.

Pour comble des moyens du demandeur, il allegue la confidence du deffendeur avec le Tresorier Iarrige, qui le rend priuable du benefice. *Nam in fraudem iuris fidem accommodat, qui aliquid tacite promittit se restitutum persona, qua legibus capere prohibetur*, Lin. *fraudem ff. de his quib. vt indig.* Confidence qui se peut recueillir de ce que Fabry n'a iamais cogneu le deffendeur pour luy vouloir tant de bien que de luy resigner vn si ample benefice, de ce que le deffendeur à pris possession, vestu des habits du Tresorier Iarrige, & accompagné de ses parens qui triomphoient en luy : & finalement de ce que le deffendeur ayant obtenu arrest à son profit avec beaucoup de peine, il s'est aussi tost desmis du benefice, moyennant de l'argent au profit de Gentils qui est partie au proces contre luy, & qui l'auoit accusé de la mesme confidence, laquelle on luy impropere aujourd'huy, de sorte que le Conseil voit la fraude toute euidente *tam ex consilio quam ex euentu, que ad eius probationem coniungi debent*.



Il y a vne autre requeste ciuile obtenüe par maistre Iean Dargilieres contre le mesme arrest duquel le demandeur se plainct, mais elle est sans fondement quelconque du moins à son esgard, parce qu'il n'y a aucune incapacité en sa personne, n'y défaut en ses tiltres alleguez à present qui ne luy ayent esté opposez au proces, & auxquels il n'ait pertinamment respondu, de sorte que le Conseil ne s'y doit point ar-  
rester, puis que ce n'est point de droit iugé, auquel il ne peut errer.

Ioinct que d'Argilieres ne dit rien contre le demandeur pourquoy il doie estre restitué contre l'arrest, car son principal moyen de requeste ciuile, qui est la precipitatio, n'est point considerable parce qu'il a deu interuenir au proces plustost, puis qu'il en auoit la commodité, sans attendre sur la fin, comme il a fait, pour se preparer vn moyen de requeste ciuile non receuable en luy *cum se arctauerit*. Dailleurs il a produit & a esté forclos de cōtredire par arrest sur requeste, contre lequel il ne s'est point pourueu, au moyen dequoy il ne se peut plaindre de precipitation, puis que toutes les formes ont esté obseruees.

Dargilieres se plainct encores de ce que l'on n'a point prononcé disertement sur son interuention, mais le Conseil jugera que ceste plainte est ridicule, d'autant que Dargilieres est compris aux qualités de l'arrest, & dauantage il est condamné aux despens, aussi que par l'arrest il est dit, que le Conseil faisant droict sur toutes les instances, a maintenu Sageaux. *Ergo*, il a fait droict sur l'interuention de Dargilieres, qui composoit l'une desdites instances, mais s'il estoit vray ce que Dargilieres dit que le Conseil eust obmis à faire droict sur son interuention, pourquoy se feroit-il pourueu contre son arrest par vne requeste ciuile, qui presuppōse vn iugement, donné à l'encontre de luy: *Nulla enim est promotio non extante sententia.*

Monsieur DE LA GRILLIERE, Rapporteur.

